



## Mayoria penshonado di PCN ta kobra nan penshun promé ku djabièrnè

**Mayoria penshonado di Fondo di Penshun Hulanda Karibense (PCN) ta kobra nan penshun promé ku djabièrnè awor, o sea promé ku dia 19 di yanüari 2024. Esaki por komprondé di deklarashon di e presidente di PCN, Harald Linkels.**

Resientemente a lanta diskushon i inkietut bou di algun penshonado prinsipalmente na Boneiru, ora e fondo a publiká un aviso kaminda ta indiká e fechanan ku mas tardá e penshunnan mester ta riba kuenta di e penshonado. Den promé instante a indiká ku esaki lo por tabata asta te dia 25 di e luna aki, ku ta mas lat ku e fondo ta paga normalmente.

Segun hefe di atministrashon di PCN, Dudley Wedervoort, tabata tin hopi kambio ku mester a prosesá e luna aki. Entre otro a adaptá e suma riba kua no ta paga impuesto, i banda di esei direktiva a disidí pa indeksá e penshunnan entrante dia promé di yanüari 2024. “E desishon final pa indeksashon tabata dependé di e grado di kubertura dia 31 di desèmber. Esaki a bira konosí despues di 10 dia di a luna aki. Pa atvertí ku esaki por kousa pago mas lat di penshun e luna aki, a saka e aviso aki”.

Dor di trabou duru, e departamentu di atministrashon a logra manda e pagonan djarason anochi pa bankonan. “Esaki ta nifiká ku gran parti di nos penshonadonan lo tin na sèn riba nan kuenta den transkurso di djaweps pa djabièrnè”. Wedervoort a muestra si ku esaki ta konta prinsipalmente pa hende ku ta kobra via di MCB Boneiru. Serka penshonadonan ku ta kobra via di otro banko, por dura algun dia mas promé ku e pago subi nan kuenta. Gran mayoria di penshonadonan di PCN sinembargo ta kobra via di MCB Boneiru.

### Dispensa

Linkels a ofresé su diskulpa pa kalke inkietut ku por a kousa serka e klientenan di e fondo. “Na final di dia, nos a paga kasi e mesun fecha ku nos ta paga normalmente. Nos ta lamentá si nos a kousa inkietut serka nos klientenan, sin ku esaki -mirando atras- tabata na nodi. Sinembargo, a disidí ku tabata mihó pa atvertí di antemano ku e pagonan lo por a kai un poko mas lat ku normal. Nos sa i ta komprondé ku yanüari ta un luna largu i tin biaha difísil pa hopi hende, inkluyendo lógikamente nos penshonadonan”.

Linkels na mes momentu a tuma tempu pa ekspresá su apresio pa e tim di PCN ku a hasi tur nan posibel pa traha i asina paga mas lihé posibel.

